



## ***Komunikadu Imprensa***

10/07/2013

### **Prova la sufisiente arguidu ba kazu inséndiu absolvidu**

Iha 09 Jullu 2013 Tribunál Distritál Baucau lee akordaun ba krime inséndiu no absolve arguidu husi akuzasaun Ministériu Públiku nian. Kazu ne'e involve arguidu Filomeno Maia Gusmão ne'ebé akuza sunu vítima José da Costa Viegas no Mariano da Costa Viegas sira nia uma, iha 5 Agostu 2011 iha Sub-Distritu Vemasse, Distritu Baucau. Kazu inséndiu ne'e rejista iha tribunál ho Númeru Prosesu: 159/Crm.C/2011/TDB.

*“JSMP ezije Ministériu Públiku atu halo investigasaun ne'ebé kle'an no halo esforsu hotu ne'ebé posível hodi halibur provas relevante hot-hotu antes lori kazu ne'e ba tribunál nune'e, bele salva interese lejítimu husi vítima sira nian iha kazu ne'e”,* dehan Diretór Ezekutivu JSMP, Luis de Oliveira Sampaio.

Ministériu Públiku akuza katak iha 5 Agostu 2011 maisumenus iha tuku 8 kalan, arguidu hodi iskeru ida sunu vítima sira nia uma. Aktu ne'e rezulta ahi han uma 2 no sasan hotu iha uma laran la konsege salva no hamosu prejuizu materiál maisumenus US\$. 5000.00 resin.

Ministériu Públiku akuza arguidu kontra artigu 263 Kódigu Penál kona-ba inséndiu (sunu ema nia uma ka edifisiu, facilidade públiku no sel-seluk tan).

Durante julgamentu arguidu nega totál akuzasaun Ministériu Públiku no deklara katak momentu kazu ne'e akontese arguidu halo hela servisu iha Díli. Arguidu mós deklara katak kazu ne'e iha tanba Polísia balun ne'ebé hala'o kna'ar iha Vemasse no vítima sira akuza deit ba nia tanba nia hanesan membru husi organizasaun arte marsiál *Persatuan Setia Hati Terate* (PSHT). Kazu sunu uma ne'e rasik akontese depoisde konfrontasaun entre grupu arte marsiál PSHT no *Ikatan Kera Sakti* (IKS).

Vítima no testamuña JCF dekalra katak sira la haree sé mak sunu sira nia uma maibé iha momentu akontesimentu ema sira ne'ebé mai sunu sira nia uma ne'e ho farda/atributu PSHT nian.

Iha alegasaun finál, Ministériu Públiku husu ba tribunál atu absolve arguidu husi kazu ne'e tanbá durante julgamentu, la iha faktus ruma hodi kondena arguidu.

Defeza mós iha nia konkluzau apoia alegasaun Ministériu Públiku tanbá durante julgamentu la produs faktus atu kondena arguidu.

Audiência ba lee akordaun ne'e prejide husi juis singulár Dr. Afonso Carmona, Ministériu Públiku representa husi Dr. Pascasio de Rosa Alves no arguidu hetan defeza husi Dr. Rui Manuel Guterres husi Defensória Públiku.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone: 3323883 | 77295795

Website: [www.jsmp.tl](http://www.jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPTl